

21 MAY 2002

MAHATHIR-JEPUN/I

DR MAHATHIR MENGADAKAN PERBINCANGAN DENGAN PM JEPUN

Oleh: Siti Hawa Othman

TOKYO, 21 Mei (Bernama) -- Perdana Menteri Datuk Seri Dr Mahathir Mohamad mengadakan perbincangan mengenai isu kepentingan bersama dan perdagangan dua hala dengan Perdana Menteri Jepun Junichiro Koizumi di pejabat rakan sejawatannya itu di Sori Kantei di sini pagi ini.

Dr Mahathir tiba di Jepun semalam untuk lawatan kerja tiga hari dari 20 hingga 22 Mei.

Beliau menghadiri jamuan malam yang diraikan bekas perdana menteri Jepun Yasuhiro Nakasone malam tadi.

Awal pagi ini, Dr Mahathir mengadakan pertemuan sambil bersarapan pagi dengan para anggota Liga Persahabatan Anggota Parlimen Jepun-Malaysia, yang anggotanya termasuk Menteri Perdagangan Antarabangsa dan Industri Jepun Takeo Hiraoka dan Menteri Kewangan Masajuro Shiokawa.

Dr Mahathir kemudian mengadakan perjumpaan dengan Dr Kisho Kurokawa, arkitek bagi Lapangan Terbang Antarabangsa KL di Sepang untuk membincangkan antara lain cadangan konsep bio-village (perkampungan bio). Bio-village telah dicadangkan sebagai satu tempat yang dikhususkan bagi kelompok industri berkaitan bio-teknologi dalam Koridor Raya Multimedia (MSC).

Dr Mahathir akan menyampaikan ucap tama mengenai "China - A Challenge or an Opportunity for Asean" (China - Satu Cabaran atau Peluang bagi Asean) di Persidangan Antarabangsa Nikkei pada tengah hari ini.

Persidangan itu, yang memberikan fokus kepada China, telah memilih tema "The Future of Asia - Emerging China and the Changing Regional Framework." (Masa Depan Asia - Kemunculan China dan Perubahan Rangka Serantau)

Pada sebelah petang, Dr Mahathir akan ditemuramah eksklusif oleh Nihon Keizai Shimbun, Inc (Nikkei) serta menghadiri satu temuramah dengan stesen televisyen N.H.K. untuk berita perdananya News 10.

Jadual lawatannya seharian ini termasuk pertemuan dengan Shiokawa yang juga Pengerusi Persatuan Jepun-Malaysia, menghadiri majlis koktel bagi para pemimpin politik Asia dengan Koizumi dan jamuan malam Persidangan Nikkei.

Pada Rabu, Dr Mahathir akan berlepas ke Nagasaki untuk majlis menamakan sebuah kapal - Puteri Intan Satu - mikik Perbadanan Perkapalan Antarabangsa Malaysia Bhd di Loji Koyagi Mitsubishi Heavy Industries Ltd's Nagasaki Shipyard & Machinery Works. -- BERNAMA

SHO SHY RON zk